

Mud Volapüka

Nüm 73

8 setul 2017

Bukemaboed

Fövot lekoned-mära yutopik
„Ventürs hieła ‚Nenolikan‘ e flenas omik“
fa hiel „N. N. Nosov“

Kapit teldegkilid. Fug.

Cinikam vemo ifasilükumon vobi, kel evifikumon kludo. Toods bofik ärönons usio ed isio, devaibölo flukis ad dis-teada-kevs. Pods e büns pävaibons balato, ab plöms - lulato. Danädü cinikam jicilils mödik pilivükofs de vob, ab plas nosi-dunön, iregulofs buigis tel pö süt. Atans inüblinofs karbatazüdavati ko sirup ini buig bal, ed inüblinofs kekis, jöledis ä daifetis valasotiks ini buig votik. Klu vob-öl-an alik äkanon fidön u drinön vati ün livüp.

Sunädo Bastetül eprimom ad beleseatön [vagükön] buigi ko keks e daifets, ab Sirupül ätatakom [jutedom lü] karbatazüdavati ko sirup. Nek äkanon demofön etanis de buigs.

Süpo jenot ejenon. Luvokäds löpöfik pä-lilons fagao, e vobölans valik eküpons sanani: hiel ‚Pilulülan‘ < rönöl dese finot fagik süta. Pulnomar kobü dünotanef valik malädanöpa äpo-rönof omi. Pilulülan äbinom ti löliko nüdiku: älenlabom te lünüli e nibliti brifik. Efi-lüjutedölo lü bim, vifiko egrämom ve stam löpio.

„Kikodo ifugor, o malädan?“ - Pulnomar ävokädof, lüjutedölo lü bim.



„Ya no binob malädanu.“ - Pilulülan egesagom, steifölo ad grämön löpiküno.

„Liö!, no binor malädanu? Igo no elibükobs ori!“ - Pulnomar äsagof, hekölo demü jutedam.

„Ab it elibükob obi.“ - Pilulülan esmililom ed edajonom linegi okik Pulnomare.

„Kio>mäpüdiku binor! Ga no udegivobs klotemi orik ore.“

„No neodob oni.“ - Pilulülan egesagom, lusmilölo.

„Ufifikor ed umalädikor.“

„Igo üf umalädikob, ab no gevegob lü obs.“

„Jemod kion!“ - Pulnomar evokädof. - „It binor sananu, ab no ludigidor sanavi.“

Eflekof oki e, pleido etovülölo kapi okik, edegolof. Dünotanef valik äpogolon ofi.

Pilulülan edaküpom, das riskäd nu no tädon omi, ed edenexänom de bim.

Jicilils mödik ezüofs omi e keliediko äsakofs:

„Binos-li koldiku kol or? Ufifikor-la! Vilor-li, das ulüblinobs klotemi pro or?“

„Blinorsös.“ - Pilulülan esion.

Jiel ‚Daun=ül=an‘ ederönof lomio ed elüblinof juüpi grünik tanedik.

„Kisu atos binon?“ - Pilulülan estunikom. -

„No vilob lenükön juüpi! Valikans olecedons-la obi jicililu.“

„Kikodo atos binon badiku? Vo-li binos badiku ad binön jicililu?“

„Si, binos badiku.“

„Kikodo? Kludo binobs-li badiku bai ced orik?“



„Nö, binors gudiku...” - Pilulülan ekofudikom - „Ab hicilils binoms gudikumu.”

„Demü kis etans binoms gudikumu?”

„Lesi, binobs gudikumu. Labobs Lüri. Sevors-li: musiganu kelik binom? No älelilors vio bepläyom fluti!”

„Älelilobs. Ab jicilils mödik bevü obs bepläyofs hapi.”

„Ab labobs Kölamarüdi. Ädaküporsöv: pöträtis kion pänom!”

„Älogedobs. Ga labors Kölamarüdi te balik, ab jicilil alik bevü obs kanof pänön ed igo brodön me fads vielik [vala=kölik]. Uplöporöv-li ad brodön yatüli redik somik, kel komon pö lebavet obik?” - Yatül esäkof.

„No uplöpoböv.” - Pilulülan esiom.

„Ekö!, ab obs valik kanobs brodön alseimi, samo, yatüli u lievüli.”

„Rajanö!” - Pilulülan eyilidom ed eprimom ad lenükön juüpi oke.

Efi=lenükölo oni, ätenükom bradis löpio ed ätenükom lögis flanio, lelogölo oki züo pö flans valik. Eküpölo Pilulülani ön vomaklotem at bisarik, Nenolikan ebruvom sekü drol. Hicilils votik äsmiloms pas om.

„Lio no jemor!” - Katülan äskänof. - „Atos no binon droliku.”

Ab smil no äseilikon. Ezülogölo äl flans valik ed eküpölo züo te logodis smilöl, Pilulülan eprimom ad deükön juüpi se ok.

„Lü kis deükor oni?..” - jicilils äsüadükofs omi.

„No neodob oni!” - Pilulülan estetom fümäliko. - „Suno ulübinoy klotemi obik.”



„Pulnomar no udegivof. Binof seväriku.“

Begesagü atos Pilulülan te esmililom klänöfiko.

Kü Pulnomar kobü dünotanef valik efi=gevegof ini malädanöp, tän sunädo edaküpof, das Murülan inepubom. Atans ejutedons ini stokacem ed edaküpons, das i klotems tel inepubons. Te klotem Glöbüla iposblibon pö stokacem.

Kludo desin fuga eklülädon, kel pidesinon fa Murülan e sanan: Pilulülan. Ma desin at, sanan: Pilulülan< änedom fugön ön stad nüdik da fenät. Midunans äspetons, das dünotanef valik malädanöpa üjutedon ad pöjutön etan; pas täno Murülan leliviko üdranomöv ini stokacem ed ütifomöv noe klotemi okik abi ut Pilulülana. Desin ijenöfikon löliko.

Pulnomar nog lunüpo äsukof Murülani ko klotemi pi=tiföl, e, du tim das suk ädulon, Murülan, klänedölo oki, äkropom pö fotül tila.

Do kropam pö til no binon jäfotu plitik, ab Murülan vemo ädafredom dö utos, das ilibükom oki mekädo. Älogedom blesiro sili lämpik blövik, yeb=üliflifik grünik. Igo smilil epubon pö logod omik. Eyulom oke, das denu neai omurom ed okotenom tefü valikos, bisä no ureafom ini malädanöp.

Fino Murülan eküpom, das Pulnomar enepubof ini malädanöp. Täno stiliko esedranom se klänedöp okik, etuvom Pilulülani ed edegivom klotemi utane.

„Gesumolös klotemi olik, o mifäta=kompenan.“ - Murülan esagom, tenükölo Pilulülane tufi, keli äkipom pö nam okik.

Pilulülan elüjutedom ad bradön fleni okik. Utans vemo iflenikoms du ästadoms in malädanöp.

Pilulülan spidiko eklotom oki.

Perönülan, Baülan, Skrubül e hicilils votik ezüoms Murülani ed eprimoms ad



benovipön omi demü geköm [geveg] de malädanöp. Valikans ästunoms dö logodanotod fredik omik.

„Balidnaedo küpob, das Murülan smililom!“ - Bastetül esagom.

Jicilils koo ästadofs züo e nulälisko älelogofs Murülani.

„Lio nem orik binon?“ - Daunülan esäkof.

„Murülan.“

„Cogor!“

„Nö! Kikodo niludor atosi?“

„Labor logodi gudik e flenöfik. Nem somik no pöton kol or.

Mud Murülana eveitikon ti jüi lils.

„Güo no pötob kol nem obik.“ - ecogedom.

„Vilor-li ad begrämön bimi?“ - Katülan emobof ome.

„Ab atos mögon-li?“

„Kikodo no mögos üfo? Ublinobs saovi ore, ovobor kobü valikans.“

„Koo ublinorsös saovi obe.“ - sanan: Pilulülan< ebegom.

„No digädor atosi, kodä ludigidor jicililis, ab benädobs ori.“ - Katülan esagof.

Jicilils elüblinofs saovis nog tel, e Murülan kobü sanan: Pilulülan< koo eyumom lä vob. Murülan ästetom, das grämön pö bims binon leplu plitikumu ka fanäbön pö malädanöp ön Pulnomar.

„Zuo binos leplu frutikumu.“ - sanan: Pilulülan< eläükom.

Äniludom, das löpo lut binon leplu flifikumu e loxina-liegikumu ka ut dono. Klu Murülan e Pilulülan ävoboms ebo pö löp bima.



Reidolsös fövoti konota pö nüm fovik.